

GLOBALISASI

Mendatangkan Peluang atau Malapetaka kepada Nasib Kaum Pekerja di Malaysia?

APA ITU GLOBALISASI?

Istilah 'globalisasi' adalah satu istilah yang terlalu umum dan merangkumi berbagai-bagai perkara termasuk kesan-kesan ekonomi, budaya, teknologi dan maklumat yang kini sudah mampu disebarkan ke seluruh pelusuk dunia dengan begitu cepat.

APA ITU GLOBALISASI NEOLIBERALISME?

Apa yang ingin dijelaskan di sini ialah kesan globalisasi ekonomi ke atas pekerja seluruh dunia, termasuklah pekerja-pekerja di Malaysia. Istilah lebih tepat yang perlu diguna pakai ialah 'neoliberalisme'.

Neoliberalisme ialah model ekonomi bebas di mana kerajaan tidak boleh lagi campur tangan dalam sebarang perkara berkenaan dengan perdagangan dan pelaburan di mana proses ini akan dikuasai oleh pelbagai peraturan dari institusi antarabangsa seperti Bank Dunia, Dana Kewangan Antarabangsa (IMF) dan Pertubuhan Perdagangan Dunia (WTO) yang didominasi oleh negara-negara kuasa besar seperti Amerika Syarikat. Neoliberalisme memberikan kebebasan ekonomi sepenuhnya kepada syarikat pengeluar (terutamanya syarikat-syarikat gergasi multinasional), pelabur asing dan bank-bank untuk menjalankan perdagangan bebas tanpa sebarang halangan dalam apa bentuk sekalipun dari pihak kerajaan untuk keuntungan maksima. Pihak kerajaan hanya berperanan untuk memastikan pembubaran polisi dan undang-undang dalaman untuk melicinkan proses ini.

APA IMPLIKASI GLOBALISASI NEOLIBERALISME KE ATAS KAUM PEKERJA?

Selain dari kebebasan dari campur tangan pihak kerajaan, globalisasi ekonomi pasaran bebas turut mengurangkan kuasa kesatuan-kesatuan pekerja yang akhirnya akan merugikan pihak pekerja.

Hilangnya peranan kesatuan pekerja hanya memastikan kebebasan penuh kepada pemilik syarikat untuk menentukan gaji yang diberi kepada pekerja dan tidak lagi ditentukan dengan persetujuan diantara syarikat dan kesatuan buruh. Serta undang-undang yang memungkinkan kewujudan hak gaji minimum turut hilang dibawah globalisasi. Atas tekanan syarikat multinasional dan juga polisi pemerintah yang memihak kepada pihak pemodal, dan bukan pekerja.



Globalisasi turut memastikan negara-negara membangun yang bergantung kepada pelabur asing dan syarikat-syarikat luar berlumba-lumba untuk memberikan lebih banyak kebebasan kepada syarikat-syarikat gergasi, mengurangkan gaji pokok pekerja, mengurangkan undang-undang yang mempertahankan hak pekerja dan persekitaran alam, serta memastikan kerajaan akan memberikan pelbagai jenis insentif kepada syarikat multinasional yang umumnya akan merugikan kaum pekerja. Selain mengurangkan peranan kerajaan untuk memberikan perlindungan kepada hak asasi rakyat dan kesatuan sekerja, globalisasi memastikan kesemua perkhidmatan awam seperti air, elektrik, perkhidmatan kesihatan, persekolahan, serta berbagai jenis sumber alam diswastakan serta dimiliki oleh syarikat swasta dan multinasional.

Penswastan besar-besaran meliputi semua jenis perkhidmatan awam pasti akan dituruti dengan pembuangan kerja secara besar-besaran juga. Untuk mengurangkan kos, syarikat pasti akan mengurangkan jumlah pekerja mereka dan ini pasti akan menambahkan jumlah pengangguran disusuli dengan harga perkhidmatan untuk utiliti seperti air dan elektrik naik berlipat-ganda.


Isu penswastan meliputi semua jenis perkhidmatan awam sudah menjadi realiti di Malaysia sejak awal tahun 80-an dan khabarnya banyak lagi perkhidmatan awam, utiliti dan sumber alam akan diswastakan oleh pihak kerajaan. Akhirnya, situasi ini akan memastikan penswastan perkhidmatan awam hanya menguntungkan pihak syarikat dan pemegang saham serta merugikan pihak pekerja.

ZON PERDAGANGAN BEBAS: Hasil Globalisasi Neoliberalisme

Apakah kesan globalisasi kepada pekerja-pekerja di Zon Perdagangan Bebas (Free Trade Zone)?

Satu contoh jelas yang menunjukkan kuasa syarikat-syarikat gergasi multinasional (TNC) terhadap pekerja di negara membangun seperti Malaysia boleh dilihat di Zon Pedagangan Bebas. Ia juga satu contoh bagaimana pihak kerajaan juga turut serta menyambut dan menggubal polisi demi membantu syarikat antarabangsa.

Di Malaysia, satu undang-undang menindas sudah wujud sejak tahun 70an, dimana pekerja-pekerja elektronik diharamkan dari menubuhkan kesatuan sekerja nasional. Ia dikuatkuasakan sebagai cara untuk menarik pelabur asing luar



negara untuk melabur di Malaysia. Satu perkara yang harus difahami ialah dibawah globalisasi ekonomi, syarikat multinasional mempunyai pengaruh yang sangat besar keatas negara-negara membangun. Negara membangun yang sangat bergantung kepada pelabur luar akan berlumba-lumba untuk mengurangkan gaji pekerja, menambahkan jam bekerja setiap hari, mengurangkan undang-undang yang wujud untuk melindungi pekerja seperti akta berkesatuan serta akta perlindungan pekerja, juga terpaksa bekerja dalam persekitaran yang tidak selamat.

Zon Perdagangan Bebas di Malaysia mempunyai majoriti pekerja perempuan yang melebihi 80 peratus dan bekerja di kilang elektronik, sementara kadar pekerja yang menjadi ahli kesatuan adalah sangat rendah. Kesatuan-kesatuan yang wujud pula hanya merupakan kesatuan dalam kilang yang tidak mempunyai banyak kuasa atau peluang untuk membela nasib pekerja. Antara sebab kenapa begitu rendah tahap pekerja yang menubuhkan kesatuan sekerja adalah akibat dari polisi kerajaan yang menghalang pekerja elektronik dari menubuhkan kesatuan sekerja nasional di kawasan Zon Perdagangan Bebas (FTZ) sejak tahun 1970.

“Perlumbaan Menuju ke Dasar” (Race to the Bottom) seperti ini dimana negara-negara membangun berlumba-lumba untuk memberi pelbagai jenis insentif kepada syarikat luar sementara mengorbankan hak pekerja yang hanya merugikan pekerja-pekerja di Malaysia, dimana semua hak mereka ditarik hanya untuk kepentingan pemegang saham dan untung maksima syarikat. Akhirnya, walaupun pelaburan dari luar dapat memberikan peluang pekerjaan, tapi kaum pekerja secara umumnya dilayan seperti pekerja hamba yang dibayar gaji yang sangat rendah.

Pekerja-pekerja di kilang pengeluaran di Malaysia juga tidak mempunyai kadar gaji minima yang diiktiraf, dimana kadar gaji pekerja secara umumnya diantara RM300 hingga RM500 sebulan. Kemungkinan gaji untuk meningkat dibawah era globalisasi adalah sangat rendah memandangkan semua negara membangun berlumba-lumba untuk mengurangkan kos buruh untuk menguntungkan dan mengundang syarikat luar supaya melabur di negara masing-masing.

Pekerja Dunia di bawah Globalisasi

Pekerja-pekerja di bawah era globalisasi berada di dalam situasi terancam. Contoh yang paling dekat adalah rakan pekerja dari negara Indonesia yang kini berada dalam keadaan yang sangat menyedihkan. Kini Indonesia mempunyai kadar pengangguran melebihi 40 juta penduduk, manakala pekerja-pekerja yang bekerja untuk syarikat multinasional hanya mempunyai pendapatan kira-kira dua Dollar AS (RM7.60) sehari.

Akibat dari situasi ekonomi yang meruncing dan akibat dari tiadanya peluang pekerjaan di Indonesia, pekerja Indonesia terpaksa menyeberang laut untuk bekerja di negara-negara asing untuk mencari sumber pendapatan.



Pekerja Indonesia yang bekerja di seberang laut pula hampir kesemuanya bekerja di dalam bidang pekerjaan yang tidak diinginkan oleh penduduk tempatan, dibayar dengan gaji yang rendah dan bekerja dalam persekitaran yang tidak selamat. Secara umumnya pekerja-pekerja asing dilayan dengan hina di negara tumpangan dan dihantar pulang apabila khidmat mereka tidak lagi diperlukan.

Adakah ini masa depan pekerja-pekerja Malaysia? Terpaksa merantau ke luar negara untuk mencari peluang pekerjaan dan dilayan dengan hina?

APAKAH GLOBALISASI NEOLIBERALISME TIDAK BOLEH DIELAKKAN?

Gerakan Rakyat Serantau dan Antarabangsa

Kini di merata dunia, ramai rakyat tertindas sudahpun sedar mengenai polisi globalisasi neoliberalisme dan ramai yang bangun menentang. Gerakan rakyat menolak polisi neoliberalisme ini bukan sahaja berlaku di dalam negara (seperti di Thailand, Indonesia, Filipina dan Korea Selatan), dimana kaum pekerja bangun memprotes polisi kerajaan mereka yang hanya menyokong globalisasi neoliberalisme. Malah aksi protes juga disusuli diperingkat antarabangsa.

Pada tahun 1999, satu gerakan rakyat antarabangsa menentang globalisasi menjadi ketara di Seattle, Amerika Syarikat sewaktu persidangan WTO (World Trade Organization/ Pertubuhan Perdagangan Antarabangsa) diadakan. Pekerja-pekerja dari merata pelusuk dunia, wakil-wakil dari kesatuan sekerja, petani, kaum perempuan, pencinta alam dan ramai lagi rakyat tertindas telah berhimpun untuk protes menentang polisi globalisasi ekonomi yang merugikan rakyat biasa.

Persidangan WTO ini akhirnya gagal dijalankan akibat dari tercetusnya protes besar-besaran ini.

JUST SAY NO TO THE WTO



CARNIVAL AGAINST CAPITAL!
SEATTLE, NOV.29-DEC.3, 1999

Semenjak dari itu, setiap perhimpunan forum ekonomi neoliberalisme yang melibatkan pemilik modal, syarikat-syarikat besar dan wakil-wakil negara pasti akan disertai dengan perhimpunan rakyat tertindas dari seluruh dunia.

Hakikatnya, globalisasi ekonomi neoliberalisme adalah bersifat global, dan tiada siapa pun dimanapun pelusuk dunia yang terkecuali dari model ekonomi yang menindas pekerja ini.

Namun, kita sebagai kaum pekerja tetap mempunyai pilihan untuk menentukan nasib kita. Sama ada kita berdiam diri atau kita sama-sama bangun menolak polisi-polisi yang menindas hak asasi kita dan generasi akan datang. Kita bukan hamba kepada pemilik modal dan globalisasi. Kita kaum pekerja adalah peneroka dan pembina kemakmuran serta kemajuan negara dan dunia. Hasil kemajuan harus dikongsi secara adil bersama rakyat.

BERFIKIR SECARA GLOBAL, BERTINDAK SECARA LOKAL



Diterbitkan oleh:

Women's Development Collective (WDC)
No. 44, Jalan Kajang Satu, Taman Sri Kajang,
43000 Kajang, Selangor D.E.
Tel: 03 87373979 / 87349680 Fax: 03 87374180
wdc@tm.net.my
<http://wdc.jinbo.net>

Didana oleh:

Heinrich Boell Foundation

Women and Workers Independent Media
and Training Center (WIMTEC)

Tel: 03-22732971

ADD: 52 C, Jalan Kemuja, Bangsar Utama
59000 Kuala Lumpur, Malaysia

Email: seminar@wimtec.zzn.com